

Alen i Teo ... petnajst let je premalo da bi vas  
zaboraveli.

Bribirska parada

**Š E N T E N C I J A  
M E S O P U S T A**

**D r I V O**

**2010.**

**SUDAC: RENE ŠEVERDIJA – TESLA**

**ABUKAT: DANIEL GRBIĆ**

**AUTOR: RENE ŠEVERDIJA – TESLA**

SUDAC

Narode moj napaćeni  
Dobri ljudi, drage ženi  
Penzići i dite malo  
Leto dan je već pasalo

Valje jedan pozdrav veli  
Simi ki ste se poseli  
Ki volite tradiciju  
Mesopust i šentenciju

Olovku kad v ruki zgrabin  
Nikogare ne pozabin  
Simi želin puno zdravlja  
I parada vas pozdravlja

Sin Bribircen na planeti  
Isto jedan pozdrav leti  
Ne zabite rodnog kraja  
Zajika i običaja

Pozdrav jedan v pulitiku  
Premijerki, predsjedniku  
I općinskoj našoj vladi  
Ča gori sidi va gradi

**UDRUGA ZA MESOPUSNE OBIČAJE BRIBIR  
NAJTOPLIJE ZAHVALJUJE SVIM  
OVOGODIŠNJIM SPONZORIMA KOJI SU  
POMOGLI U REALIZACIJI MAČKARA, A  
POSEBNO:**

**OPĆINI VINODOLSKOJ**

**ŽUPANIJI PRIMORSKO GORANSKOJ**

**TURISTIČKOJ AGENCIJI „KATARINA LINE“  
OPATIJA VL. KATARINA HAUPFELD**

**AUTOR SE ZAHVALJUJE TETI KATI, LJUBI  
ŠKODIĆU I FRANI MICULINIĆU NA POMOĆI  
VA BRIBIRSKOJ BESEDI .**

Budite mi zdravo živo  
Dimit oće ovo „DrIVO“  
Na kraji van lipa fala  
JOŠ HRVATSKA NIJ PROPALA  
TAMBUR

Jel ko leto bilo teže  
Kajiž nan se jako steže  
Nit je soldi niti dela  
Sej praznija i padela

Sirotinju samo zvizni  
I porez je zmišljen krizni  
Nij još svitla va tuneli  
Ni v gradi još manje v seli

Se to narod jako boli  
Prosvjeduju v metropoli  
Ratar se za svoje bori  
Stali ljudi i traktori

Za se čaj krenulo krivo  
Najveći je krivac „DrIVO“  
Va Hrvatskoj nova moda  
Da kapetan biži z broda

Črni oblak kad je stigal  
„DrIVO“ j svoje sidro digal  
Z pulitike se povukal  
I bermudice obukal

Pa krenul na „Malo vitra“  
Ki mu tamo jaja titra  
A govor je bil mu zadnji  
Fala simi na suradnji

TAMBUR

### ABUKAT

Ča si se uspinil suče  
Dal te vrag s ostrugi tuče  
Tužba ti se mili bože  
Na tanjucnih nogah vože

I od mene pozdrav veli  
Za si ljudi vavon seli  
Ja vas grlin s obi ruki  
S vami san va istoj muki

Sudac neka ne bulazni  
I moji su žepi prazni  
Puklo mij i slipo črivo  
Obranit ću naše „DrIVO“

Ja ti jeben kaplju rosnu  
Neće bižat on va Bosnu  
Tu se bori za pravicu  
Nima drugu putovnicu

Saki tretu nima dela  
Nećeš krsta nač vesela  
Triba vidit čaj to s nami  
Za puno smo krivi sami

Ovdij zdavni slika prava  
Nek susedu krepa krava  
Pa ćemo se s prve ruki  
Lipo rugat tujoj muki

Dokli čovik more zivat  
Triba smet se i zapivat  
I poštvat koga mora  
Pometat spred svoga dvora

Nismo skrozi još mi v riti  
Ča bi daj ovo Haiti  
Povidit ću spred paradi  
Još nas božja ruka gladi

Hote kušnut svoju dicu  
Ženu stisnut za guzicu  
Ki pridete na Čokovo  
Čut očete jel ča novo

Va njen je još više dima  
Ma dozvolu Vito nima  
Fičo nij dočekał zoru  
Finil je va tujen dvoru

Stezala jej vučna služba  
Goranu će prit i tužba  
Jel ded Tiho bil ponosan  
Napuhal je dva i osan

TAMBUR

### ABUKAT

Na kraji od ove slami  
Čaj ostalo simi nami  
Nikakovo blagostanje  
Nego generalno sranje

Dici slaba perspektiva  
I budućnost više siva  
Sad je gore nego prije  
Još smo dugo od unije

Nakrali su se na vrhi  
A narod prolaze srhi  
Ne znan jel podatak tačan  
Saki peti čovik lačan

Za Šimića i Glavaša  
Tesnaj bila lipa naša  
Ali „DrIVO“ j patriota  
Ne biži od svoga plota

Nij krivac za saku stavku  
Ni za HŽ ni Podravku  
Napadaš ga to nij lipo  
I za onu banku Hypo

Mor nij farbal on tuneli  
Ni od toga zimal deli  
Strpaš li ga v Remetinac  
Sam sebi naruči vinac

Sad su v reštih menadžeri  
A ne tati i gangsteri  
Lipaj tamo sad ergela  
Za jist nose in s hotela

Sada lipo i stražari  
Puše Marlboro cigari  
Va istoj su tamo kaši  
Lopovi i odlikaši

Čul san ma me kurac boli  
Opira se otok goli  
Tamo ote si tajkuni  
Zač nij mesta va pržuni

Dok ne vrnu dug državi  
Doli ote čuvat kravi  
Samo ne znan ajme meni  
Ki in oće čuvat ženi

Njin ostaloj fala bogu  
Za pilates i za jogu  
I račun i ma ne tanki  
Va kakovoj stranoj banki

TAMBUR

## SUDAC

Glasalo sej v prošlon leti  
Četiri put bože sveti  
Za vjeće i načelnika  
Sako drvo svoja slika

Kakovaj to jagma bila  
Ne bil vlast se osvojila  
Zijalo sej i na šanki  
Viljaj zišal z svoje stranki

Njimi niš, stradala kola  
Ni „r“ više od renola  
„DrIVO“ će in ima boga  
BMW-a ostavit svoga

-----

Još je jedan problem mići  
Plavoga nij više fići  
Fići naše teti Mici  
Nigdanje nan poštarici

Četverac je krenul mladi  
Nedilju nakon paradi  
Vnuk od Tihi vnuk od Mice  
I mlajahne dvi curice

Fanj su bili već va piću  
V bakinog su seli fiću  
I krenuli z našeg sela  
Vidit kadi još ča dela

Šli su drito ništa novo  
Crikvenicu kroz Katlovo  
Povidit i ovo moran  
Za volanon bil je Goran

V glavi mu se malo vrti  
Priko lesi on se prti  
Kucak valje totu laje  
Gazdi v kući signal daje

Ne poznaš va noći tati  
Pa ga Boro šćapon mlati  
Daj to Rade on nij maril  
Priko pleć gaj bil preharil

Mesopust mu navoj strani  
Daje jedni kostobrani  
Hokejašku još kacigu  
Kad pije da nima brigu

TAMBUR

### ABUKAT

Tamburašen vjetrobriani  
Za karneval na pilani  
Tu stradali su od bure  
I zvučniki i tambure

Još tableti protiv spanja  
Kad vraćaju se z sviranja  
Zaspali su ma ne lačni  
Kušin jej probudil zračni

Novu vlast smo mi dobili  
Kakovu smo zaslužili  
Lipo nan je ljudi moji  
Mi starimo vrime stoji

Celo vijeće majko sveta  
Nima jednog fakulteta  
Z rukava su zvukli asa  
Teca Rajka Arbanasa

Jedino mi malo smeta  
Više gori nij Potpleta  
Ma mu kaplje odozgora  
Aktivan je v dva odbora

Ki sad oće dirigirat  
Po Bribiri asvaltirat  
Delalo sej jako malo  
Bez Ivana i toj stalo

Birali smo načelnika  
I njegova zamjenika  
Neizvjesnoj bilo malo  
Isto niš se nij minjalo

Uzalud plakati, letki  
Ćoravi su se to metki  
V kolendari ćemo sinjat  
Kad se počne čagod minjat

Niman koga zato krivit  
Mi nećemo to doživiti  
Tribij šparat na papiri  
Za glasanje va Bribiri

Još me jedno tu nervira  
Ki glasački odbor bira  
Kriteriji ki su totu  
To bin otel doznat sprotu

Cela Hrvatska odzvanja  
Predizborna je kampanja  
Si kreću va ljuti boj  
Na listami Judin broj

O birači vite čuda  
Komuj to za kuma Juda  
Na ton broju nij se stalo  
Jednoj grlo odustalo

Nogi su se zaljuljale  
Kad su prišli Radi v Štale  
Jel in to bil potez mudar  
Radej z dvoron imel sudar

Nij to bila lipa slika  
Štok na dvoruj od kamika  
Lokva krvi na kamiku  
Domuzin ga vozi v Riku

Lipi štembilj posrid glavi  
Priko nosa dvanajst šavi  
Jedan više ili manje  
Bez narkozi na šivanje

Još gaj jednuč stresla srića  
Kad je skočil do Jutrića  
Ti ljudi su ta dan klali  
V dvori meso povišali

Kad je v dvori puno mesa  
Zaključanaj onda lesa  
Radej popil toga dana  
Nastavil bi u Zorana



Za si starci i starice  
Jedne nove slušalice  
Nek in to bu pomoć prva  
Kad Domuzin pili drva

Punoj još va njemu moće  
Voli pilit o pol noće  
Va kući san svojoj sidel  
Bil veroval da nis videl

Friška drva ekstra klasa  
Dvi motorki puna gasa  
Va domi su tu noć ženi  
Popile si praksiteni

Va Plodinah Dado dela  
I Rade z vrh našeg sela  
Kako su se lipo bili  
Starin leton oprostili

Na delu se natakali  
A ni kašnje nisu stali  
Zadnju da su litru pili  
Va Jargovi u Kurili

Predizborna kreću kola  
Samo s 12 apostola  
Vavo štivo ne bi stalo  
Ča sej toga obećalo

Kij kampanje financiral  
Doklij pošten narod biral  
Uskok sada o ton zbori  
Ki su bili donatori

Kako te dokazat oni  
Odkud pusti milioni  
Potrošen je novac silan  
A najviše Bandić Milan

Nij pomogla igra skupa  
Ni to čaj bil u biskupa  
Gorak je on popil serum  
Nij pomogal mu ni Kerum

Utrka nij bila duga  
Jel tribalo drugog kruga  
Glas smo dali vavoj turi  
Za čovika od kulturi

Muzičkuj on finil školu  
Lip je ima bradu golu  
Ne znan jel to komu krivo  
I njegovoj ime „DrIVO“

TAMBUR

### ABUKAT

Sitil san se „Čuvarini“  
Toj bilo na ovoj bini  
Biloj smiha biloj plača  
I prisnac i bazlamača

Jurej plakal prošlaj Mare  
Žalile su ženi stare  
Dičina i si susedi  
Starinske si čul besedi

Besedi i običaji  
takoj bilo vavon kraji  
svedočilaj puna sala  
kako mrtva se čuvala

Uz mrtvu se fanj i pilo  
Nigdaj stvarno tako bilo  
Užanci naš narod voli  
Zato KUD-u kapa doli

Ostavlja toj pročelnici  
Čaja s rumon v termosici  
I glazbenu ima želju  
Kad zadnji put ga otpelju

Kad bu ležal na Čokovi  
Repertoar neće novi  
Neka Rade pride kletu  
Obljetnicu slavit tretu

-----

Još je kratka zapisana  
Za Evicu i Zlatana  
Ostavlja in majko sveta  
„Vijagri“ dvajstri paketa

Nek mu stalno stoji zgoru  
Nek se praše dokli moru  
Mora bit va njemu moće  
Eva bi po cele noće

TAMBUR

### ABUKAT

Va staračkon domi ki su  
Sul pri sebi ili nisu  
Ostavinaj jedna sprotu  
Neka saki projde stotu

Ča tij hćeri ki te pači  
Enoj zmija na kalači  
Po Pipina teci uju  
Da ubije ljutu guju

Neće Mira joj prilaziti  
Nego će ju Braca zgaziti  
Priletel je on od šuba  
Naoružan baš do zuba

Lovac je to ga se tiče  
Zač se zmija ta ne miče  
Ča imate vas dvi v glavi  
Mor je ručka to od tavi

-----

I do Željki mi se žuri  
Ministrice od kulturi  
Ona lipo od Stipanje  
Pojde malo na kupanje

Istinaj to ljudi živa  
Na tri kralji ona pliva  
Kakoj dobro to za sinus  
Ti se kupaš, vani minus

Amateri ti su bili  
Za Oskara odglumili  
Imeli su režisera  
Sej snimila i kamera

A si tribi to da znate  
Autor je teta Kate  
Onaj komad ta pisala  
I zato joj lipa fala

KUD još nij otresla kriza  
Bit će brzo i repriza  
Ki nij videl neka pride  
Za sih će se nač katride

A Kate se posla lovi  
Pa već piše komad novi  
Neka piše bogu fala  
Opet bit će tesna sala

Lipo Kati teku slova  
Skoroj priča ta gotova  
Povidit ću nij sramota  
Za jesen se spravlja „Dota“

TAMBUR

## SUDAC

Spomenut ću alaj vera  
Dva šofera rekordera  
I mediji su pisali  
Kuliko su napuhali

Bolje da sidiš va tenki  
Kad je za volanon Frenki  
Prija bil je biciklista  
Sad muj tesna cela cista

Na konjaku i na lozi  
Do Grižan se on provozi  
Na Čokovi par ga puti  
Štopa pandur va auti

Prvo pita bože mili  
Gospodine stel ča pili  
Veli Frenki z ove bandi  
Za obedon dvi bevandi

Od čegaj ta obed kuhal  
Da tri i pol je napuhal  
To za praviti sad nij lazna  
Kulikaj tu bila kazna

Zaželil muj puno zdravlja  
„Malo vitra“ mu ostavlja  
Već kad krade bogu dani  
Nek krstari po Jadrani

Udrugi ostavlja lipo  
Veli račun v banki Hypo  
Si čeki i gotovinu  
Za tombulu i cinkvinu

I roduli i pineli  
Čin su farbani tuneli  
Udruga će znat je blatiti  
To se dobro da naplatiti

TAMBUR

## SUDAC

Ovu dalje ostavinu  
Šalje drito na Rivinu  
Frizerki u mirovini  
Za zmijolov dva durbini

Na Maševi to sej zbito  
Grdu zmiju sej lovilo  
Okol kuće Mira landra  
Upomoć ju zove Sandra

## OPORUKA

### ABUKAT

Ovdi dalje nima mita  
Oporuka sad se čita  
Posmrtna muj bila želja  
Da parada ga otpelja

Parada ga sada žali  
Zač najviše njimi fali  
Njin ostavlja recesiju  
I najdražu kolekciju

Za sakoga ručna ura  
Da pozdrave prija škura  
I od Plive aspirini  
Kad zbole ih glavini

A staromu kapelniku  
Od Jadranke Kosor sliku  
Da pokaže kapetanu  
Ki muj zadal smrtnu ranu

Autoru šentencije  
Daje svoje najmilije  
Stranački muj bil kolega  
Kako dalje će bež njega

Frenki zato i ne mari  
Voli konjak i cigari  
I sakog se dana đira  
Do Grižan pa do Bribira

Dugo nen o tomu slinit  
Zač se jednuč mora finit  
Prišloj i do toga dana  
Punoj popil u Deana

I k Romeuj bil zavrnu  
A sad bi se doma vrnul  
Potrefit će doma morda  
Pa sida va svoga forda

Jel problem va očnon tlaki  
On četiri vidi traki  
Nij stigal na zavoj prvi  
Prija finil je na drvi

Ostal je bez prednjeg kraja  
Srića pa su cela jaja  
Simi veli stara bena  
Da muj zasmetala žena

Toj starija žena bila  
Još i brentu daj nosila  
Nij svatila ta čovik brižan  
Toj spomenik v centru Grižan

Prvobitnoj opet stanje  
Sada pije zeru manje  
Na becikli on je miran  
A autoj garažiran

Još je jači bil od njega  
Poznanik mu i kolega  
Va lipon je vavik moti  
A vozi se va tojoti

Bivšij rendžer pa ne mari  
Kad ustave ga žandari  
Rekord ostal je Bribiri  
On napuhal je četiri

TAMBUR

### ABUKAT

Lanjskoj leto moćno bilo  
Pak je voće urodilo  
Slivi, hrušvi, armulini  
Čredve, črišnje i malini

Sil svedoki si podmitil  
Da se ne bi ki ča sital  
To tij „DrIVO“ slaba nada  
Saznat će se kada tada

Ideju si imel glupu  
Va saborsku nazad klupu  
Probal sjebat si Jadranku  
Vodeću rasturit stranku

Ma sej Jaca lipo sada  
Krupnog rešila otpada  
Lete glave alaj vera  
Korupcijij zeta mera

I ti brzo si otpisan  
Sa stranačke liste zbrisan  
Franceku si palil sviću  
Da bi ti podaril sriću

Ma piše va ovon redi  
Brzo bit ćete susedi  
Ja ti kaznu ne dan manju  
Putuj i pozdravi Franju

UDARAC SABLJUN

Čemol kada do istini  
Kakoj bilo to va Ini  
Tamoj sada vela tuga  
Prišlaj hiljadu sto druga

To piše va kolendari  
Tada stigli su Mađari  
Pod palicun Kolomana  
Toj slika nigdanjih dana

Povist opet se ponavlja  
Mađar s Inun sad upravlja  
Malo više nego pola  
Vlasništvov njihova MOL-a

Kuliko si totu digal  
Uskok tamo još nij stigal  
Sil to dal za lipe oči  
Evdi narodu predoči

Nikomure nisi rekal  
V Austriju si utekal  
Nisi makal na skijanje  
Nego v Hypo sredit sranje

Kad je blago dal na pašu  
Zove diver svoju snašu  
Slivi te pobirat rada  
Kuhat će se marmelada

Kad su koši natrpali  
Va garažu su se dali  
Naginjali su z čašice  
Dok su znimali košćice

Pelinkovac da su pili  
Malo su i založili  
Na šporheti je padela  
Već diši garaža cela

Krhće pekmez redon šprica  
Već gaj puna i škrinjica  
Našpricani zidi celi  
Palentar je va padeli

Veli snaha da će skočit  
Na Bribirsku nogi smočit  
Bočice se neka moče  
Sej gotovo do pol noće

Diver kljane božju strinu  
Finit oču to na plinu  
Nen više ja šporhet hajcat  
Ni okolo njega tancat

Prileć oču evdi malo  
Dok se bude to kuhalo  
Dok je nanal šteta vela  
Zgorel pekmez i padela

Palentara više nima  
A garaža puna dima  
Va zimmnici nove stavki  
Ji se pekmez od Podravki

TAMBUR

### SUDAC

Da lovački rečen grihi  
Napisal san dva tri stihi  
Šentencija ogovara  
I Zlatka lovočuvara

Voli Zlatko svoju ladu  
Više nego curu mladu  
Kad je s ladun i kad pije  
On osamljen nikad nije

Lipi poklon na Ivanju  
Doznake o bolovanju  
Nos razbijen a i glava  
Plava boja prevladava  
TAMBUR

### SUDAC

Niki nij bil ravan tebi  
Doma Spliti ni Zagrebi  
Glavni v sakon razgovori  
I va stranki i v sabori

Divanel si bilaj tema  
Va Hrvatskoj krize nema  
I unija daj pred vrati  
Jedva čeka na Hrvati

Još si zijal na veliko  
Ovdi teku med i mliko  
Oči si nan popitural  
Pa si zbrisal nisi zdural

Mislel si da mi smo ludi  
Hrvatska ti sada sudi  
A bil biš dal ruku livu  
Da ti nisi prodal Plivu



Spomenut moran i Štale  
Tu užance nisu stale  
Od sakud su ljudi bili  
Dizalo sej na perili

Si se dive lipon maju  
Dan se bliži svomu kraju  
Meruj zelo već lokilo  
Šimac pal je va perilo

Jel otel postignut slavu  
Toj bil skok direkt na glavu  
Nisu dobri bili znaki  
Nogi su ostale v zraki

Joža Požarić je totu  
Prvu pomoć pruža sprotu  
Toj merikah on naučil  
Priko Šimca sej skoprčil

Brzo su je ljudi bili  
Na nogi ohovistili  
Ive težej tu povređen  
Pajdaš Joža nij ozljeđen

Po asvalti lada niva  
Čini ti se koda pliva  
Gre bez greške sakud skoro  
More brzo more sporo

Po loših se puti kreće  
Ali Zlatka izdat neće  
Bilo mehko ili tvrdo  
I va dolac i na brdo

Dulji puti i na kratko  
Lovočuvar vozi Zlatko  
Po Kurinu i po Lazu  
Pozna lada saku stazu

Prošlu jesen zgorij hodil  
Mali peh mu sej dogodil  
Dobroj prošal se krivini  
Dok nij prišal va Ugrini

Na zavoji pravac love  
Iza kuće Marinove  
Niki tako reče opet  
Da sej na krov mislel popet

Sprovat lađu moj nebore  
Dal po krovi vozit more  
Pa daj brže vozit otel  
Morda bi se bil i popel

Sporaj vožnja ladi bila  
Pa sej na nos nasadila  
Orjentir je na dimniki  
Završilaj va ulniki

Marin zija ki su vrazi  
Ki mi to po kući gazi  
A nij lahko mu na duši  
Koda mu se kuća ruši

Nepriliki vidi ove  
Prvu pomoć valje zove  
Velaj šteta ladi nivi  
Samo Zlatko da preživi

Vatrogasci prvi stižu  
I škarami vrata rižu  
To su jaki ljudi mladi  
Brzo su ga zvukli z ladi

Bači vinaj isto totu  
Za Davora krigljin sprotu  
Mrcinaj to bome jaka  
I ne pije z napršnjaka

Pojedinci su s te kuće  
Leteli van igrat buće  
Kad popiju nij ih briga  
Čaj na jogi puno sniga

I na sridi Graca sela  
Veli se božićnjak dela  
Lipo su ga nasadili  
A još lipše okitili

Daj dugačak devet metar  
Povidel je Picljin Petar  
Totuj jila daj milina  
I sto litar bela vina

Ki su tati va plasanji  
Petrovi snitili panji  
Ta su oganj ljudi bili  
Tek drugi dan ugasili

Za ovoga smo Božića  
Krenuli od Veljačića  
Va Ugrini donje selo  
Biloj živo i veselo

Maj su digli zakajlali  
Zapivali zatanjali  
Na roštilji meso cvrči  
Prst ti se od zime grči

Kakoj zima bože sveti  
I Davor je va jaketi  
Na tamburi smrzle žice  
Gremo dalje ne pišice

Spustili smo se va leri  
Sad se staje va Kičeri  
I oni su maj svoj digli  
Prija nego mi smo stigli

Nisu pekli na roštilji  
Na gulašu su u Hrilji  
Ponovo se stol servira  
Dok tambura lipo svira

Zgljedaloj to jako grdo  
Glavinun je bubnol v tvrdo  
Činjenicaj manje bitna  
Odpejalaj Zlatka hitna

Za dva dana bože sveti  
Već za šankon je bufeti  
Črnoj ispod oba oka  
Ali isto neće soka

Preživeli je zlatko ovo  
Vozi šumun on ponovo  
Sad ga ova bena brani  
Nisu krivi maligani

#### TAMBUR

#### ABUKAT

Va Podskoči mila majko  
Zapival je Ive Rajko  
Mladi dečki tu su bili  
Ivanju šnjini proslavili

Pivali su pisme znane  
I Ive i teta Ane  
Muzika nabija živa  
Na kraji se zumba piva

Rasteže se harmonika  
Titovaj v kredenci slika  
Ive ovo zabit neće  
Ma muzika dalje kreće

Živahni su nisu leni  
Zija Marin gremo k meni  
Ali tamo nij Ivana  
Samo Tiho i Suzana

Suzanu su sprotu bili  
Va Ivanu prekrstili  
Imendan joj čestitaju  
Vino piju i pivaju

Va organce Tiho svira  
Kršul stare pisme bira  
Svetoga su tu Ivana  
Slavili do drugog dana

Suseda sej jedna bila  
Isto njimi pridružila  
Jolej trubu sviral prije  
Mislelaj da tele blije

Sandali i špigerice  
I kupaće od dičice  
Japanke i espadrili  
I šosić od čiste svili

Čoće bože kad ugrije  
Va šoping se mora prije  
Denis oće navlič pare  
Zač on toči za mačkare

TAMBUR

### ABUKAT

O Badnjaki v našen kraji  
V sakon selu dižu maji  
Pa se onda to okiti  
I po noći lipo sviti

Narod totu se namnoži  
Poloče se i založi  
Zapiva se ma ne solo  
Starinsko zaigra kolo

Tu vina ne fali v čaši  
A pridu i tamburaši  
Pa se narod lipo družu  
I do noće se produži

Nij prošlo od toga malo  
Misec dan je već pasalo  
V garaži od toga doma  
Čudna širi se aroma

Da se blago nij posralo  
Ilij kadi ča krepalo  
Nisu zmiije nisu tvori  
Od segaj ta miris gori

Ne znan ki tu progovara  
Da ne smrdi ča z ormara  
Nemojte va latu prdit  
Mor roba ne more smrdit

Kiselina grize solna  
Istinaj za Nives bolna  
Smiluj mi se bože sveti  
Va ormari samo smeti

Z oba oka teku suzi  
Najskuplje su prošle bluzi  
I dvi tanjucne pidžami  
U Rapaji su na jami

Tiho voli kumpaniju  
Pismu vino i rakiju  
Va svojoj garaži doli  
Dela čriplje kad god roli

Čriplje su za krompir Lički  
Ženan gratis da popički  
Nij u njega recesije  
Više dela nego prije

Grozdovi kad rodi fino  
Zna načinit dobro vino  
V kuću pridu gosti razni  
Pa se bači brzo sprazni

TAMBUR

## SUDAC

Dvi tri riči sad bin rekal  
Za penzije ki jej stekal  
Ne znaš koga totu krivit  
S penzijun je teško živit

Ako si va familiji  
To su tvoji najmiliji  
Tu penziju svoju daješ  
Morda kašnje se i kaješ

Prigovor se često čuje  
Da mlad stara ne poštuje  
Badave se stari jade  
Ne utječe to na mlade

Kada žive skupa v kući  
Razgovori teku vrući  
Kraj penzije mladost živi  
A reku ti ki te šljivi

Stari narod onemoća  
Za život je poteškoća  
Još ti stari jedno mogu  
Da se žale dragon bogu

Ki penziju bolju ima  
Postotak se oduzima  
To su teme dosti vruće  
Granica je tri tisuće

Ki su ispod toga ruba  
To je stoka sitna zuba  
Ča bi rekli sitna riba  
Tomu više i ne triba

Se stane va črne vrići  
Tribat oće na prolići  
Oće Denis tu багаžu  
Odnest v ormar va garažu

Nives smeti strest će isto  
Voli žena kad je čisto  
Od obeda čaj ostalo  
Pol sarmi i zela malo

Streslaj se čaj va padeli  
I od čera dvi sardeli  
Od mački pomelaj dlaki  
Od jogurta tetrapaki

Na hodniki vrići črne  
Pazi da se ka ne zvrne  
Sad će Denis gazda pravi  
Svoj del posla da obavi

V ormar letnju robu spravlja  
Na dno dvora smeti stavlja  
Jutro smeće se pobira  
Va ton delu od Bribira

Smrdi koda tu su prasci  
Dal da zove vatrogasci  
Da prilete ovdi trkon  
I simku operu šmrkon

Bil gaj otpeljal do domu  
I nij pal va plinsku komu  
Opri šajbe glava viri  
Vani minus je četiri

Delal Ive toj i prije  
Zač se zgubi kad popije  
S kurca će mu narast nokat  
Prija neg prestane lokat

TAMBUR

## SUDAC

Daj ti malo manje slini  
Gren se spustit va Ugrini  
Svetićimi na dno sela  
Nives to mij povidela

Trefilo sej jednog dana  
Toj nevesti od Dragana  
Ovo neće zaboravit  
Letnju robu da gre spraviti

Kad projde sedandeseta  
Čovik v kući samo smeta  
Moreš sidit v jednon kuti  
Još ti reku stari šuti

Kad pravilo to prekršiš  
Va staračkon domi svršiš  
Koda krst va buru piša  
I reku ti ko te šiša

Tu va domi sača čuješ  
Ali niš ne odlučuješ  
Nikogar za niš ne kriviš  
Još samo kot biljka živiš

Tu penziju i ne vidiš  
Kot mumija ležiš sidiš  
Toj se tako utvrđeno  
Daj čoviku to suđeno

Nesmiš pišat protiv vetra  
Zač oć poć do svetog Petra  
Na kraji tij ovo plaća  
Od tud niki se ne vraća

TAMBUR

## ABUKAT

Još o tomu se divani  
Dogodilo sej i lani  
Glavni glumac opet isti  
Prominili se statisti

Zadnji petak lanjskog leta  
Toj večer od nogometa  
Va dvorani utakmicu  
Pa k Renati na pivicu

Već letimi dečki znani  
Petkon igraju v dvorani  
Vole fanti fiskulturu  
A ki zgube plate turu

Potegnu i više rado  
Tamoj skoro uvik Dado  
Na šanki su zadnja pića  
Za Dadu i za Svetića

Kad lokilaj bilo dosti  
Izlaze i zadnji gosti  
Gljeda Dado glavun mrda  
Dal me ovo niki sprda

Još nis va takovon motu  
Moja simkaj bila totu  
Nij ju otpeljala žena  
Ona vozi citroena

Ne zna koga da okrivi  
Pa sej Šimca sitil Ivi  
Jebo veli sliku svoju  
On je sel va simku moju

Enoj vektra od Ivice  
Anđelu spred ribarnice  
Svetiću va džipa sida  
Jadan je ma ne ujida

Vozi me do Rošće sela  
Bože jel mi simka cela  
Na pilani moj nebore  
Tuj auto štopi gore

Ne zijaju i ne kljanu  
Ive spava na volanu  
Tek sada bi Dado plakal  
Šofer v simki sej pokakal